

一切如來心祕密全身舍利寶篋印陀羅尼經

開府儀同三司特進試鴻臚卿肅國公食邑三千戶賜紫贈司空謚大鑒正

號大廣智大興善寺三藏沙門不空奉 詔譯

如是我聞：一時薄伽梵在摩伽陀國無垢園寶光明池側，與大菩薩眾及大聲聞僧，天、龍、藥叉、健闥婆、阿蘇羅、迦樓羅、緊那羅、摩睺羅伽、人非人等無量百千大眾俱，前後圍繞。

爾時眾中有一大婆羅門名無垢妙光，多聞聰慧，人所樂見，常奉十善，於三寶所決定信向，善心懇重，智慧微細，常欲令一切眾生相應善利，大富豐饒，資具圓滿。時彼婆羅門無垢妙光從座而起，往詣佛所，遶佛七匝，以眾香花奉獻世尊，無價妙衣、瓔珞珠鬘、持覆佛上，頂禮雙足，却住一面，作如是請言：唯願世尊與諸大眾，明日晨朝至我宅中受我供養。

爾時世尊默然許之。時婆羅門知佛受請，遽還本所，即於是夜廣辦餽饋，百味飲食，灑掃殿宇，張施幡蓋，種種莊嚴。至明旦已，與諸眷屬，持眾香花及諸伎樂，至如來所，白佛言：世尊！願赴我請，今正是時，願垂聽許。

爾時世尊安慰彼婆羅門無垢妙光已，顧視大眾，告言：汝等皆應往彼婆羅門家，令彼獲大善利。於是世尊即從座起，纔起座已，即從佛身出種種光明，間錯妙色，照觸十方，悉皆警覺一切，既警覺已，然後取道。時婆羅門以恭敬心，持妙香花，與諸眷屬及天龍八部，釋梵護世，先行治道，奉引如來。爾時世尊，於前路不遠，中止一園，名曰豐財，於彼園中有古朽塔，摧壞崩倒，荊棘所沒，榛草充遍，覆諸礪磔，狀若土堆。

爾時世尊徑往塔所，時朽塔上放大光明，赫然熾盛，於土聚中出妙音聲讚言：善哉！善哉！釋迦牟尼如來，今日所行極善境界。又曰：汝婆羅門今日獲大善利。爾時世尊禮彼朽塔，右遶三匝，脫身上衣用覆其上，泫然垂淚，涕泗交流，泣已微笑。當爾之時，十方諸佛皆同觀視，亦皆垂淚，俱放光明來照是塔。爾時隨從大眾皆感怪異，驚怖而住。時金剛手菩薩亦復垂淚，所執杵威焰熾盛，往詣佛前而白佛言：世尊！何因緣故現是瑞相？如來何故流淚如是？十方諸佛何故放大光明現前，唯願如來於大眾前釋我等所疑。時薄伽梵告金剛手：此大全身舍利聚如來塔，一切如來如俱胝胡麻心陀羅尼印法要今在其中。金剛手！有此法要在其中故，是塔即為如胡麻俱胝百千如來之身，亦是如胡麻百千俱胝如來全身舍利聚，乃至八萬四千法蘊亦住其中，即是九十九百千俱胝如來頂相亦在其中。是塔一切如來之所授記，若是塔所在之處，即有大功勳，具大威德，能滿一切吉慶。爾時大眾聞佛是說，遠塵離垢及隨煩惱，得法眼淨，其中即有得須陀洹果者，得斯陀含果者，得阿那含果者，得阿羅漢果者，或有得辟支佛道者，或有入菩薩位者，或有得阿鞞跋致者，或有得菩提授記者，或有得初地、二地、乃至十地者，或有

滿足六波羅蜜者，其婆羅門遠塵離垢，得五神通。爾時金剛手菩薩見此奇特希有之事，即白佛言：世尊！甚奇特希有！但聞此事，尚獲如是殊勝功德，何況於此法要種殖善根，獲大福聚。佛言：諦聽！金剛手！若有善男子、善女人、比丘、比丘尼、優婆塞、優婆夷，書寫此經典者，即為書寫彼九十九百千俱胝如胡麻如來所說經典，即於彼九十九百千俱胝如胡麻如來種殖善根，即為彼等如來護念攝受。若人讀誦此經，即為讀誦過去一切諸佛所說經典。若受持此經，即彼十方九十九百千俱胝如胡麻如來應正等覺，於一方所，晝夜遙加攝護。若人供養此經，以花香、塗香、花鬘、衣服嚴具而作供養，即於彼十方九十九百千俱胝如來之前，成天妙花、妙香、衣服嚴具，七寶所成，積如須彌，而為供養，種殖善根，亦復如是。爾時天龍八部，人非人等，見聞是已，各懷希有，互相謂言：奇哉威德！是朽土聚以如來神力加持故有如是神變。時金剛手白佛言：世尊！何因緣故此七寶塔現為土聚？佛告金剛手：此非土聚，乃是七寶所成大寶塔耳。復次，金剛手！由諸眾生業果故隱，非如來全身舍利而可毀壞，豈有如來金剛藏身而可壞耶？但以眾生業果因緣示現隱耳。復次，金剛手！後世末法逼迫時，多有眾生習行非法而墮地獄，不敬佛法僧，不種殖善根，以是緣故，妙法當隱，唯除此塔，為一切如來神力所護持，以是因緣，我今流淚，彼諸如來，亦以是事悉皆流淚。爾時金剛手菩薩白佛言：世尊！若有人書寫此經安置塔中，獲幾許福？佛告金剛手：若人書寫此經置塔中，是塔即為一切如來金剛藏窣堵波，亦為一切如來陀羅尼心祕密加持窣堵波，即為九十九百千俱胝如胡麻如來窣堵波。亦為一切如來佛頂佛眼窣堵波，即為一切如來神力所護。若於佛形像及一切窣堵波中安置此經者，其像即為七寶所成，其窣堵波即為七寶傘蓋，珠網露槃交結，德字鈴鐸七寶所莊嚴，一切如來於此法要加其威力，以誠實本誓加持。若有有情於此塔種殖善根，必定於阿耨多羅三藐三菩提得不退轉，乃至應墮阿鼻地獄者，若於此塔一禮拜、一圍遶，必得解脫，皆得不退轉於阿耨多羅三藐三菩提；塔及形像所在之處，即為一切如來神力所護，其處不為惡風雷雹霹靂所害；又復不為毒蛇、毒蟲、毒獸所傷；不為惡星怪鳥，鸚鵡鳩鴿，蟲鼠虎狼蜂蠆之所傷害；亦無夜叉、羅刹、部多、比舍遮，癩癘鬼之怖；亦不為一切寒熱諸病，癩癘癰毒，瘡癬疥癩所染。若人暫見是塔，一切諸難悉皆消除，其處亦無人馬牛疫、童男童女疫，亦不為非命所夭，亦不為刀杖水火所傷，亦不為他敵所侵，飢饉所逼，厭魅呪詛不能得便，四大天王與諸眷屬晝夜衛護，二十八部大藥叉將及日月五星幢雲彗星晝夜護持，一切龍王加其精氣，順時降雨，一切諸天與忉利天三時下來供養禮拜此塔；一切諸仙，三時來集，讚詠旋遶；釋提桓因與諸天女晝夜三時下來供養，其處即為一切如來神力護念加持。若人作塔，以土木石，金銀赤銅，書此法要安置其中，纔安置已，其塔即為七寶所成，上下階級，露盤傘蓋，鈴鐸輪檜，純為七寶，其塔四方如來形像亦復如是，為一切如來神力所持，其七寶塔全身舍利藏即高至阿迦尼瑟詫

【akaniṣṭhāḥ】天宮，一切諸天守衛供養。金剛手白佛言：世尊！何因緣故，此法要有如是殊勝功德？

佛告金剛手：以此寶篋陀羅尼威神力故。金剛手言：唯願如來哀愍我等說是陀羅尼。佛言：諦聽！金剛手！此是一切如來，未來、現在、及已般涅槃者全身舍利，皆在寶篋印陀羅尼中，是諸如來所有三身亦在其中。爾時世尊即說陀羅尼曰：

曩莫悉怛唎(三合)耶地尾(二合)迦(引)喃(引)薩嚩怛他(引)誡哆(引)喃(引)唵(引)部尾
婆嚩那嚩嚩(引)嚩遮斯嚩(二合)遮呢(引)薩(引)度薩(引)度薩(引)度多囉舍(引)迦也(二
合)怛他(引)誡哆(引)地也(二合)瞿(引)遮嚩(引)沒囉(二合)訶曼(二合)婆嚩底惹也嚩嚩
(引)阿儞商娑(引)地也(二合)鉢囉(二合引)波帝(二合引)薩頗(二合引)囉薩頗(二合引)囉
舍(引)迦也(二合)怛他(引)誡多達囉磨(二合)斫迦囉(二合)鉢囉(二合)嚩囉哆(二合)呢
(引)嚩日囉(二合)冒(引)地都(引)波娑鉢哆(二合)囉哆那(二合引)楞迦(引)囉(引)楞訖
哩(二合)帝(引)薩嚩怛他(引)誡哆(引)地瑟恥(二合)帝(引)冒(引)馱野冒(引)馱野冒(引)
地冒(引)地沒地也(二合)沒地也(二合)參冒(引)馱呢(引)參冒(引)馱野遮攞遮攞遮懶都
薩嚩(引)嚩囉拏(引)儼薩嚩鉢(引)波尾誡帝(引)戶嚕戶嚕薩嚩戍(引)迦尾伽帝(引)薩
嚩怛他(引)誡哆嚩日囉(二合)誡囉婆(二合)尾誡囉(二合)訶(引)地唎(二合)史曳(二合引)
參婆(引)囉參婆(引)囉底攞舍薩俱(二合引)胝儼庾哆舍哆薩訶悉囉(二合)怛他(引)誡
哆麼呬野(二合)馱(引)囉拏(引)馱囉磨(二合)俱(引)勢(引)參哆底也(二合引)嚩囉哆(二
合)呢(引)薩嚩怛他(引)誡哆(引)地瑟恥(二合)多馱(引)都誡囉婆(二合)都(引)閉(引)娑
嚩(二合引)訶(引)三摩耶(引)地瑟恥(二合)帝(引)娑嚩(二合引)訶(引)薩嚩怛他(引)誡哆
紇哩(二合)捺野迦覽荼母捺囉(二合引)馱(引)囉拏(引)娑嚩(二合引)訶(引)蘇鉢囉(二合)
底瑟恥(二合)多斯都(二合引)閉(引)怛他(引)誡哆俱(引)胝儼庾哆(引)訶囉儼(二合)舍
摩儞鉢砌(引)捺(引)地瑟恥(二合)帝吽(引)吽(引)娑嚩(二合引)訶(引)唵(引)薩嚩怛他
(引)誡都(引)瑟拏(二合引)灑母(引)囉馱(二合引)喃(引)尾部(引)史多(引)地瑟恥(二合)
帝(引)吽(引)吽(引)娑嚩(二合引)訶(引)

Namas triya-dhvikānām sarva tathāgatānām. Oṃ, bhuvi bhavana
vare vacas vacane, sādhu sādhu, sādhitara śākya-tathāgata adya
go-care, brahman bhavati jaya vare anu-śaṃsa adya prāpte. Sphāra
sphāra śākya-tathāgata dharma-cakra pra-vartane. Vajra-bodhi-thūpa
sapta-ratna alaṃ-kāra alaṃ-kṛte, sarva tathāgata adhiṣṭhite. Bodhaya
bodhaya, bodhi bodhi, budhya budhya, saṃ-bodhane saṃ-bodhaya.
Cala cala calantu sarva ā-varaṇāni, sarva pāpa vi-gate, huru huru
sarva śoka vi-ghāte. Sarva tathāgata-vajra-garbha-vigraha adhrṣye.
Saṃ-bhāra saṃ-bhāra tilāśas koṭi-niyuta-śata-sahasra tathāgata

guhya-dhāraṇī-dharma-kośe; saṃ-taty ā-vartane sarva tathāgata adhiṣṭhita dhātu-garbha-thūpe svāhā. Samaya adhiṣṭhite svāhā. Sarva tathāgata-hṛdaya-karaṇḍa-mudrā-dhāraṇī svāhā. Su-pratiṣṭhita stūpe tathāgata koṭi-niyuta ahar-nīsam anupa-ccheda adhiṣṭhite hūṃ hūṃ svāhā. Oṃ, sarva tathāgatoṣṇīṣa mūrdhānām vi-bhūṣita adhiṣṭhite hūṃ hūṃ svāhā.

爾時世尊說是陀羅尼時，從朽塔處有七寶窰堵波自然涌出，高廣嚴飾，莊嚴微妙，放大光明。時彼十方九十九百千俱胝那庾多如來，皆稱讚釋迦牟尼佛而作是言：善哉！善哉！釋迦如來，能說如是廣大法要，安置如是法藏於閻浮提，令諸眾生利樂安隱。若有善男子、善女人，安此法要及陀羅尼於塔像中者，我等十方諸佛隨其方處恒常隨逐，一切時以神通力及誓願力加持護念。

爾時世尊說此大《全身舍利寶篋印陀羅尼》廣作佛事已，然後往彼婆羅門家受諸供養，令無數天、人獲大福利已却還住所。爾時大眾，比丘、比丘尼、優婆塞、優婆夷、天、龍、夜叉、健闥婆、阿修羅、迦樓羅、緊那羅、摩睺羅伽，人非人等，皆大歡喜，信受奉行。

一切如來心祕密全身舍利寶篋印陀羅尼經

【經文資訊】大正新脩大藏經第 19 冊 No. 1022A 一切如來心祕密全身舍利寶篋印陀羅尼經

【版本記錄】CBETA 電子佛典 Rev. 1.15 (Big5), 完成日期：2007/10/16

【編輯說明】本資料庫由中華電子佛典協會（CBETA）依大正新脩大藏經所編輯

【原始資料】蕭鎮國大德提供，北美某大德提供

【其他事項】本資料庫可自由免費流通，詳細內容請參閱【中華電子佛典協會版權宣告】

公元二零一四年三月五日馬來西亞萬撓佛教會蔡文端居士修訂。

咒語最後修正於公元二零一四年三月五日。

咒語於公元二零一四年十月二十一日再修正。